

醫  
統  
正  
脈  
全  
書

八十

医统正脉全书

八函 八十册

北京市中国书店出版

北京市新华书店发行

定价：七百六十元

傷寒明理續論卷六

江陰朱氏校刊本

明 餘杭陶 華述

傷寒三陰三陽脈證論

傷寒汗下溫之法最不可輕據脈以驗證問證而對脈  
太陽者陽證之表也陽明者陽證之裏也少陽者三陽  
三陰之間太陰少陰厥陰又居於裏總謂之陰證也發  
於外則太陽爲之首發於內則少陰爲之先太陽惡寒  
而少陰亦惡寒但太陽之脈多浮少陰之脈沉細與其  
他證狀亦自異也發熱惡寒身體疼痛或自汗或無汗

是爲表證可汗不惡寒反惡熱口燥咽乾壯熱腹滿小便如常而大便秘結是爲裏證可下厥冷囊拳自利煩燥而無身熱頭疼是爲陰證可溫浮洪緊數此表病之脈沉實滑數此裏病之脈微細緩芤此陰病之脈在表者邪傳於榮衛之間在裏者邪入於胃腑之內胃腑之下少陽居焉若傳之陰則爲邪氣入臟矣榮與衛俱爲表也亦均可汗也然有汗者爲傷風風傷衛氣則以桂枝助陽而汗之輕無汗者爲傷寒寒傷榮氣則以麻黃湯助陽而汗之重榮衛固爲表也胃腑亦可以爲表也

然以腑臟而分表裏則在腑爲之表在臟爲之裏胃取諸腑可以表言若合榮衛腑臟而分之則表者榮衛之所行裏者胃腑之所主而臟則又深於裏者矣審脈問證辯明定經真知其爲表邪則汗之真知其爲裏邪則下之真知其爲陰證則溫之表有邪則爲陽虛陰經受邪則爲臟病而溫裏之藥熱如此而汗如彼而下又如彼而溫桂枝承氣投之不差薑附理中發而必中大抵治傷寒有法投劑少差死生立見古人處方立論曰可汗曰可下曰可溫曰和解曰少與曰急下與夫先溫其

裏乃發其表先解其表乃攻其裏謂知奇者若網在綱  
有條不紊論至於此則知古人之立論甚嚴而汗下溫  
之法亦不可輕也信矣經曰傷寒六七日目中不了了  
無表證脈雖浮亦有可下者少陰病二三日無裏證亦  
有可汗者陰證四逆法當用溫而四逆散性寒豈可用  
哉曰醫在九流之中非圓機之士不足爲語也脈雖浮  
而亦可下者無表證謂六七日不大便借使大便不難  
其敢輕下之乎少陰病亦有發汗者少陰本無熱反發  
熱而表猶未解故用溫藥微取其汗也借使身不發熱

其敢輕汗之乎四逆湯用薑附四逆散用枳柴一寒一  
熱病主四逆固不侔矣然傳經之邪與陰經受邪初病  
便厥者不同四逆散用藥寒主先陽後陰也四逆湯用  
藥熱主陽不足而陰有餘也若張氏之論日數多則日  
日數雖多但有表證而脈浮者猶可發汗日數雖少若  
有裏證而脈沉實者卽須下之此日數之不可拘也至  
如陽極發厥陰極發燥陰證似陽陽證似陰差之毫釐  
繆以千里可不深思而熟慮也哉

陰陽虛實用藥寒溫辨

傷寒一書所謂陰陽虛盛則精微之義不無辯析於其間四十八難曰病之虛實出者爲虛入者爲實蓋表之眞陽旣虛故陰邪以盛出而乘陽是以脈浮於外其病在表法當汗之當其陰邪出表脈浮於外之時不可自感以爲陽脈盛也裏之眞陰旣虛故陽邪以盛入而乘陰是以脈入於內其病在裏法當下之當其陽邪入裏脈實於內之時不可自感以爲陰脈盛也是說非古人之立言也蓋使人知如此之爲陰盛則抑陰而助陽如彼之爲陽盛則抑陽而助陰陰甚則邪出於外者發表



之藥當性溫以助陽氣如桂枝湯之類是也陽盛則邪入於內者攻裏之藥當性寒以抑陽氣如承氣湯之類是也或曰陰出而乘於外是陽之不足也陽病則當有以發表而汗之何哉是大不然陰邪傳於外不汗之則邪何由而去桂枝之性溫溫之乃所以助陽陽有所助而長則陰邪之所由以消辛甘發散爲陽者此也張氏所謂承氣入胃陰盛乃亡者正恐陰盛出外而誤以承氣下之安得而不亡或者有陽入而承於內是陰之不足也陰病則當有以溫養而下之何哉是又不然陽邪

入於內不下之則邪從何而出承氣之性寒寒之乃所以抑陽陽受其抑則微而眞陰之所由以長酸苦湧泄爲陰者此也張氏所謂桂枝下咽陽盛則斃正恐陽盛入內而誤以汗之又安得而不死觀古人發表之藥多溫攻裏之藥多寒則知陰陽虛實之意微非止於汗下設矣所以爲用藥寒溫設也

### 六經用藥格法

太陽屬膀胱寒水非發汗不能愈亦有桂枝麻黃以助陽祛邪此膀胱寒水之經有標本之作風寒初客仍在

表宜用辛溫之劑以發散之若無頭痛惡寒或非冬時皆不可用

陽明屬胃非通泄不能痊必用大黃芒硝以疎利陽熱此言表證已罷頭痛惡寒已除則熱歸陽明之本矣宜承氣湯寒劑以泄熱若惡寒未除則爲表寒邪尙在不可下也冬時亦宜用不可拘忌

少陽屬膽無出入之道柴胡半夏能利能汗消解血熱黃芩佐之

太陰脾土惟惡寒溼非乾薑白朮不能燥溼也

少陰腎水惟惡寒燥非附子不能溫潤

厥陰肝木藏血榮筋非芍藥甘草不能滋養此用藥經常之道也

陰陽虛盛用藥寒溫辯

夫傷寒發表攻裏之藥寒熱殊途用之一差死生反掌所以越人仲景深致意於其間也難經云傷寒陽虛陰盛汗之則愈下之則死陽盛陰虛汗之則死下之則愈且寒邪之傷人也有淺深焉淺者汗之深者下之此古今不易之定法也方其風寒初客皮毛之間陰氣乃盛

閉塞腠理身中陽氣已虛不能禦衛遂有惡風惡寒之  
證見焉當此之時止宜桂枝湯辛甘溫之藥助陽抑陰  
而發之陰邪既散表氣冲和而愈經云辛甘發散爲陽  
者是也不知用此而反以承氣湯苦寒之藥下之表裏  
俱傷不亡何待表邪既罷寒作爲熱陽陷入深而盛於  
裏則津液消耗腸胃燥澁而臟腑之真陰虛矣陰氣既  
虛卽譫妄狂燥煩渴惡熱之病而作也當此之時宜用  
承氣湯苦寒之劑扶陰抑陽而泄去熱氣陽邪卽退胃  
中真陰來復裏氣和平而愈內經所謂酸苦湧泄爲陰

者是也不知用此乃以桂枝辛熱之藥助邪伐正安有  
不斃者乎所以仲景云桂枝下咽陽盛則斃承氣入胃  
陰盛乃亡良以此夫嗚呼此論誠爲傷寒汗下之樞機  
乎俗醫不能達此爲妙昧於陰陽虛盛之道悖逆此理  
而不殺人也幾希經云發表不遠熱攻裏不遠寒豈虛  
語哉

### 三陰三陽脈證

經云尺寸俱浮大者陽受病也當一二日發以其脈上  
連風府故頭項痛腰脊強傷寒則發熱惡寒傷風則鼻

塞惡風然傷風有汗傷寒無汗

尺寸俱長者陽明受病也當二三日發以其脈夾鼻絡於目故身熱目疼鼻乾不得卧又日不惡寒而作渴皆爲在經不惡寒反惡熱自汗出大便難

尺寸俱弦者少陽受病也當三四日發以其脈循脇絡於耳故胸脇痛而耳聾口苦咽乾目眩往來寒熱而嘔此三經受病未入於腑者可汗而已

尺寸俱沉細者太陰受病也當四五日發以其脈布胃中絡於嗌故腹滿而咽乾或腹痛手足溫自利不渴

尺寸俱沉者少陰受病也當五六日發以其脈貫腎絡於肺繫舌本故口燥舌乾而渴惡寒口中和默默欲寐時時腹痛又咽痛三證

尺寸俱微緩者厥陰受病也當六七日發以其脈循陰器絡於肝故煩滿而囊縮唇青舌捲筋急或渴不欲食卽吐蛔此三經皆受病也已入於腑者可下而已此皆自陽經傳來者故宜下而去之非若陰經自中之寒此則爲眞陰證矣當用四逆湯輩溫之

汗下溫正法



太陽傷風自汗惡風桂枝湯傷寒無汗惡寒麻黃湯陽  
明不惡寒反惡熱自汗者大便難大柴胡湯小承氣湯  
汗不止者胃汁乾急下之大承氣湯無汗惡寒升麻葛  
根湯有汗脈遲微惡寒爲表未解桂枝湯無汗脈浮而  
喘麻黃湯

少陽證病屬小柴胡湯

太陰自利不渴爲臟寒理中湯四逆湯胸中脹滿枳實  
理中丸脹滿脈浮桂枝湯脹滿時痛桂枝加芍藥湯痛  
甚桂枝加大黃湯

少陰脈沉口不乾舌不燥皆惡寒小便清白四逆湯始  
得病脈沉反發熱麻黃附子細辛湯口燥咽乾而渴  
急下之大承氣湯六經中惟此一經難治大要以口燥  
而渴知其熱脈沉而遲別其寒

厥陰脈微浮爲欲愈不浮爲未愈小建中湯脈浮緩如  
瘧狀桂枝麻黃各半湯脈沉短者囊必縮爲毒氣入臟  
承氣湯下之利不止者四逆湯

傷風見寒傷寒見風脈證

熱盛而煩手足自溫脈浮而緊此傷風見寒脈也不煩

少熱四肢微厥脈浮而緩此傷寒見風脈也

二者爲榮衛俱病法用大青龍湯然不可輕用須風寒俱盛又加煩燥方可與之

一法以桂枝麻黃湯尤穩今改羌活湯

### 三陽合病

本太陽病若汗若下若利小便無津液胃中燥轉屬陽明是爲脾約若惡寒用升麻葛根不惡寒反惡熱大便難白虎湯譫語者調胃承氣湯下之喘而胸滿者不可下麻黃湯太陽少陽頭項強急脇下硬滿目眩往來寒

熱小柴胡湯

少陽陽明本少陽病因爲發汗利小便後胃中燥大便難屬調胃承氣湯

正陽陽明乃本經風盛氣實也大柴胡湯大小承氣湯選用之

三陽合病腹滿身重譫語遺尿口中不仁屬白虎湯口乾舌燥不仁背惡寒同太陽陽明少陽陽明正陽陽明無表證者俱可下惟惡寒者爲太陽陽明合病未過經爲屬表可發汗桂枝麻黃各半湯蓋在經則汗過經則

下也

太陽陽明併病

本太陽病發汗則汗出不徹因轉出陽明續自微汗出不惡寒是併歸陽明也

太陽證尙在桂枝麻黃各半湯太陽證也大小承氣湯陽明證也

春溫變熱

溫熱病者冬時感寒偶不卽發寒毒藏於肌膚至春變爲溫病夏變爲暑病暑病者熱又甚於溫也溫病發於

春三月夏至前是也發熱咳嗽頭疼身痛口燥渴脈浮  
弦熱甚者小柴胡湯熱微者升麻葛根湯解肌湯微熱  
不渴小柴胡加桂枝湯者加五味渴者去半夏加栝蒌  
人參脈實煩渴者大柴胡湯微利之以其脈實必大便  
難也虛煩者竹葉石膏湯然用羌活湯解之爲當渴加  
知母石膏

夏月熱病發熱頭疼身體痛重不惡寒而惡熱其脈洪  
不可溫宜羌活湯渴加知母石膏三月至夏謂之晚發  
梔子升麻湯有少陽證者小柴胡湯更於前方內選用

若春夏有惡風惡寒類傷寒證者蓋當時暴中風寒之氣新病卽非冬時受寒通用羌活湯治之

### 瘧

瘧者先太陽中風重感寒溫所致經曰身熱足寒頸項強急惡寒時時頭熱面赤目赤獨頭面搖卒口噤背反張者瘧病也桂枝加栝蘂湯主之傷風頭痛常自汗出而嘔者若汗之必發瘧大發濕家汗亦作瘧新產血虛汗出傷風亦作瘧若其脈沉弦而遲或帶緊或散於指外皆惡候也

發熱無汗惡寒爲剛瘧葛根湯或麻黃葛根湯發熱有汗不惡寒爲柔瘧桂枝加葛根湯桂枝芍藥葛根湯二瘧通用小續命湯剛瘧爲陽去附子柔瘧爲陰去麻黃剛瘧胸滿口噤咬牙腳攣臥不著席大承氣湯下之柔瘧桂心白朮湯附子防風湯白朮散桂枝煮散選用

### 風溫濕溫

風溫尺寸俱浮素傷於風因而傷熱風與熱搏卽爲風溫其外證四肢不收身熱自汗頭疼喘息發渴昏睡或體重不仁慎勿發汗汗之則譫語煩燥目無精彩病在



少陰厥陰二經葳蕤湯人參敗毒散葛根龍膽湯小柴胡湯選用未醒者柴胡桂枝湯

發汗已身灼熱知母葛根湯渴甚栝蘆根湯脈浮身重汗出漢防己湯誤汗風溫防己黃耆湯

濕溫寸濡而弱尺小而急素傷於濕因而中暑濕與熱搏卽爲濕溫其狀胷腹滿目痛壯熱妄言自汗兩脛逆冷攣急惡寒若發其汗使人不能言耳聾不知痛處其身青而色變醫殺之耳

濕溫太陽經用白虎蒼朮湯加桂枝濕勝則一身盡痛

發熱身黃小便不利大便反快五苓散加茵陳臟腑虛  
自利甚理中湯朮附湯

風濕中濕

風濕脈浮先傷濕而後傷風也其證肢體腫痛不能轉  
側額上微汗惡寒不欲去衣大便難小便利熱至日晡  
西而劇治法但微解肌若正發汗則風去濕在非徒無  
益而又害之解肌用麻黃杏子薏苡甘草湯白朮防己  
黃耆湯不嘔不渴脈浮虛者桂枝附子湯濕多身痛小  
便自利甘草附子湯煩渴小便不利五苓散外不熱內

不渴小便自利朮附湯緩若昏迷腹滿身重自汗失音  
下利不禁白通湯加白朮去甘草身腫痛微喘惡風杏  
仁湯人參敗毒散通用熱而煩渴者加栝蘆若誤下之  
小便必不利可五苓散中濕小便不利大便自利甘草  
附子湯五苓散大小便皆利則與朮附湯身體痛或鼻  
塞小建中湯加黃耆

溫毒中暍

溫毒者冬月感寒毒異氣至春始發也表證未罷毒氣  
不散故有發斑之證心下煩悶嘔逆咳嗽後必下利寸

脈洪數尺脈實大爲病則重以陽氣盛故耳治法通用  
玄參升麻湯黑膏主之詳見發斑條中

中暑脈虛而伏身熱背惡寒面垢自汗煩燥大渴毛聳  
惡寒昏昏倦怠而身不痛與傷寒諸證不同矣內外俱  
熱口燥煩渴四肢微冷而身不痛用白虎湯痰逆惡寒  
橘皮湯熱悶不惡寒竹葉石膏湯頭痛惡心煩燥心下  
不快小便不利五苓散下消暑丸中暑用小柴胡湯最  
良脈芤遲腠理開洒然毛聳口齒燥白虎加人參湯霍  
亂煩燥大渴腹痛四肢冷脚轉筋以黃連香薷湯

發熱

夫翕翕然而熱者表熱也有蒸蒸而熱者裏熱也其屬表者風寒客於皮膚邪氣怫鬱於外表熱而裏不熱也其屬裏者陽氣下陷入於陰中裏熱甚而達表也其在半表半裏者以表熱未罷邪氣傳裏裏未作實則表裏俱熱而但輕於純在裏也太陽厥陰皆不發熱惟少陰反有發熱之證或其脈沉或下利手足冷爲異耳雖然傷寒發熱病之常也脈陰陽俱虛熱不止者汗後復發熱脈燥疾下利者皆不易治其可例視之乎

太陽病發熱頭疼惡寒有汗桂枝湯惡寒無汗麻黃湯  
傷寒六七日目中不了了無表裏證大便難身微熱此  
爲實急下之大承氣湯脈浮數者大柴胡湯

陽明病發熱汗出脈浮數實者調胃承氣湯脈浮桂枝  
湯汗多者胃汁乾急下大承氣湯

中風發熱六七日不解而煩有表裏證渴欲飲水水入  
卽吐名曰水逆五苓散脈浮而大其人發熱煩渴小便  
赤表裏俱見五苓散

少陽發熱脈弦細而嘔小柴胡湯

少陰反發熱有二病脈沉者麻黃附子細辛湯下利厥  
逆裏寒外熱脈不出者通脈四逆湯

脈浮熱甚反灸之因火而動必咽燥吐血四逆湯脈浮  
大遲表熱裏寒下利清穀四逆湯發熱口乾鼻燥能食  
者黃芩湯

脈浮發熱無汗而渴表未解也小柴胡湯加人參栝藹  
湯壯熱頭痛心中煩者梔子黃芩湯汗下後有熱大汗  
則損氣氣損則陽微故脈虛而惡寒大下則傷血血傷  
則陰弱故脈濇而發熱誤汗誤下皆有此耳且陰以陽

明理經言 卷六 三  
爲主陽以陰爲根下之亡陰矣陰無所主邪氣搏之血  
虛乃發熱也

太陽病發汗遂發熱惡寒小柴胡湯蒸蒸而熱者屬胃  
調胃承氣湯

下後陰弱而發熱是爲內熱葶藶苦酒湯若脈浮則汗  
之麻黃湯脈實則下之大柴胡湯大下後身熱不去心  
中結痛者未欲解梔子豉湯發汗又復下之惡寒發熱  
無休止時小建中湯

傷寒以圓藥下之身熱不去微煩者梔子乾薑湯



下後身熱不去心中結痛者梔子豉湯瘥後勞復發熱  
小柴胡湯脈浮者當汗解柴胡桂枝湯脈沉者當下解  
調胃承氣湯

下利腹反痞滿者生薑瀉心湯小便不利麥門冬湯食  
復發熱梔子豉湯加大黃病後虛羸微熱不去者竹葉  
石膏湯

頭痛

大凡頭痛屬三陽乃邪氣上攻也太陽專主頭痛陽明  
少陽亦有之三陰絡上不過頭惟厥陰循喉嚨之後上

連目系頂顛故有頭痛乾嘔吐涎沫之證却無身熱亦與陽證不同雖然風濕在少陰濕溫在太陰其經從足走至胸中而還及頭痛過於陰毒是又不可拘也若兩感於寒太陽少陰俱病則頭痛口乾煩滿而渴與夫頭痛極甚又連於腦手足寒者則爲真頭痛不可治矣

太陽病頭痛發熱惡寒無汗麻黃湯有汗桂枝湯已發汗未發汗頭痛如破者葛根葱白湯

太陽病下之脈細數者頭痛未止連鬚葱白湯

陽明頭痛不惡寒反惡熱六七日不大便胃實氣攻於

上也少與調胃承氣湯

少陽頭痛脈弦發熱小柴胡湯

濕家頭痛鼻塞瓜蒂末納鼻中黃水出立愈

痰涎頭痛胸滿寒熱脈緊瓜蒂散吐之

厥陰頭痛乾嘔吐涎沫吳茱萸湯

頭痛收熱心煩梔子黃芩湯

天行勞復頭痛四肢痛蔥頭湯

項強

項背強者太陽表邪也發散則解結胸項強有下之證

寒濕項強則成瘕見本條臨病宜審

太陽病項強無汗惡風爲表實葛根湯項背強發熱汗者惡風爲表虛桂枝加葛根誤下太陰結胸項強大陷胸丸一法頻與理中丸若損甚者兼與四逆湯項強脇下滿身熱惡風手足溫而渴小柴胡湯

陰毒初得病項背強咽痛心腹痛短氣厥逆吐利身如被杖附子湯陰毒甘草湯正陽湯天行復作熱至晚則腰痛頭項強身重葛根生姜豉湯

惡風

惡風者見風則怯密室之中無所惡也風傷衛氣衛虛則腠理不密由是而惡矣悉屬於陽非比惡寒有陰陽之別若無汗而惡寒者爲傷寒當發其汗汗出而惡風者則爲中風當解其肌不可更發汗若裏證甚而惡風未罷尤當先解其表三陽風濕皆有此證不可不辯

太陽中風陽浮陰弱惡風自汗發熱鼻暍乾嘔桂枝湯頭痛發熱身疼腰痛骨節疼惡風無汗而喘麻黃湯發汗太過衛虛亡陽遂漏不止而惡風者法當用溫桂枝

附子湯

小便難四肢微急難以屈伸治與上同

若吐若下後七八日不解表裏俱熱時惡風大渴舌乾燥而煩白虎加人參湯

汗不止必惡風煩燥不得卧先防風白朮牡蠣湯次小建中湯風濕惡風不欲去衣骨節煩疼不得屈伸汗出短氣小便不利或身微腫甘草附子湯

脈浮身重汗出惡風防己黃耆湯

### 惡寒

惡寒者不見風亦惡寒身雖熱亦不欲去衣被其風寒

客於榮衛陰氣上入陽中則洒淅而惡寒也經曰發熱惡寒者發於陽也無熱惡寒者發於陰也謂如或已發熱或未發熱必先惡寒而繼之以發熱此則發於陽也若初病惡寒而倦脈沉細而緊此則爲熱發於陰也在陽則發汗在陰則溫裏或下證悉具而微惡寒者是表猶未解當先解表而後攻裏若少陰病惡寒而倦手足厥冷自利燥煩脈不至者又爲不治之證

太陽病發熱或未發熱惡寒有汗桂枝湯無汗麻黃湯病發熱惡寒熱多寒少脈微弱者無陽也不可發汗越

婢湯

陽明病固宜下微惡寒者係與太陽合病在經屬表可發汗麻黃湯若脈遲汗多微惡寒者表未解也雖陽明證可桂枝湯

少陽病頭汗出微惡寒柴胡桂枝湯

發熱汗出後惡寒而嘔但心下痞者五苓散發汗後惡寒者虛也芍藥附子甘草湯

惡寒脈微而復利正亡血也四逆湯加人參汗後惡寒脈細數浮遲嘔不止理中丸



大下後復發汗心下痞而惡寒表未解也當先解表桂枝湯後攻痞三黃瀉心湯

太陽病下後脈促胸滿者桂枝去芍藥若微惡寒者桂枝加芍藥附子湯

少陰病脈沉細惡寒者四逆湯

若下利惡寒而倦手足溫者小建中湯若惡寒而倦時時自煩不欲厚衣大柴胡湯

亡血家不可發汗汗之則寒慄而振小柴胡湯芍藥湯脈弱者不可發汗汗之則寒慄不能自還當歸四逆湯

背惡寒

背爲陽腹爲陰背惡寒陽不足也陽不足則陰氣盛陰氣盛者口中和陽氣內陷者口乾燥附子白虎宜詳審口中和背惡寒者屬少陰附子湯及灸氣海陽氣內陷口乾燥背惡寒白虎湯

寒熱

寒熱往來者陰陽相勝邪正相爭而作也蓋陽不足則陰邪出於表而與之爭故陰勝而爲寒陰不足則陽邪入於裏而與之爭故陽勝而爲熱邪居表多則多寒邪

居裏多則多熱邪在半表半裏則寒熱相爭乍往乍來而間作也小柴胡湯專主寒熱寒多者加桂熱多者加大黃是大法也

太陽病八九日如瘧狀發熱惡寒熱多寒少不嘔清便自可一日二三度發桂枝麻黃各半湯脈微緩者不可汗宜越婢湯

病至十餘日熱結在裏往來寒熱大柴胡湯

心煩發嘔胸膈滿不欲食寒熱往來小柴胡湯

汗下後不嘔不渴頭汗出胸膈滿小便不利寒熱往來

柴胡桂薑湯

熱多寒少尺脈遲者榮血不足黃耆建中湯脈浮大寒熱往來宜祛邪凡婦人中風七八日續得寒熱發作有時經水道斷爲熱入血室小柴胡湯

潮熱

潮熱屬陽明陽明旺於未申一日一發日晡而作也邪入胃腑爲可下之證設或脈浮而緊潮熱而利或小便難大便澹者熱未入腑猶帶表邪先當和解其外如小便利大便硬方可攻之若潮熱於寅卯寅卯則屬少陽

潮於巳午則屬太陽是又不可不辯

病人煩熱汗出則解又如瘧狀日晡潮熱脈實可下小承氣湯或大柴胡脈虛者不可下桂枝湯

陽明病潮熱大便微硬者大承氣湯

陽明病脈浮而緊必潮熱發作有時但脈浮者必盜汗出柴胡桂枝湯

腹滿不大便潮熱小承氣湯微利之

### 似瘧

似瘧一名瘧狀作止有時非若寒熱往來無定也

太陽似瘧脈伏洪桂枝湯清便自可不嘔一日二三度發桂枝麻黃各半湯

陽明似瘧煩熱汗出日晡發熱脈浮桂枝湯脈實承氣湯

婦人熱入血室其血必結亦如瘧狀小柴胡湯

熱多寒少陽乘陰也若尺脈遲爲血少先以黃耆建中湯養其榮衛脈不遲却以小柴胡湯桂枝二越婢湯選用之

厥陰脈浮緩囊不縮必發熱惡寒似瘧爲欲愈桂枝麻

黃各半湯溫瘧其脈如平身無寒但熱骨節煩疼時嘔  
白虎湯加桂渴者柴胡加人參栝藹湯

無汗

無汗寒邪中經腠理閉密津液內滲而無汗也若風暑  
溼干之則自汗出矣當汗之證與麻黃湯三劑而不得  
汗者此又不可療也

太陽當熱無汗頭痛麻黃湯

項背強兀兀無汗葛根湯

剛瘧發熱惡寒無汗葛根湯或小續命湯

脈浮發熱無汗表不解者麻黃湯汗不止白虎湯  
渴欲飲水無表證者白虎加人參陽明反無汗脈浮而  
喘者麻黃湯若無汗小便不利心中懊憹身必發黃五  
苓散加茵陳

### 自汗

衛氣者所以肥腠理而固津液者也衛爲邪所干不能  
衛護於外由是而汗出焉且自汗者有表裏虛實之分  
若自汗出惡風寒爲表未解當解肌以致汗泄惡風與  
汗後惡寒皆爲表虛必用溫劑若汗出不惡風寒則爲



表解裏未和從下之  
或汗出髮潤如油如珠凝而不  
流皆不可治也

太陽中風自汗脈浮  
桂枝湯

汗出而渴小便難五苓散不渴者茯苓甘草湯

自汗出小便難而用桂枝惟加芍藥甘草

自汗出小便不數心煩微惡寒脚攣急桂枝附子

陽明汗多而渴發熱譫語大便硬調胃承氣湯

太陽病發汗遂漏不止惡風寒桂枝附子湯

若小便自利而汗出為津液少不可攻利宜蜜導煎通

田玉經言 卷六  
之若汗多者胃汁乾急下之大承氣湯

汗多而渴勿用五苓散

汗不止無他證者溫粉撲之服桂枝湯大汗出煩渴不解脈洪大者白虎加人參

下後不可更用桂枝湯

若汗而喘無大熱者麻黃杏仁甘草石膏湯

諸陽經絡循於頭三陰則至項而還頭汗者邪搏諸陽則汗見於頭也若遍身汗者爲之熱越令熱不得越而陽氣上騰津液上腠故但頭汗耳夫表虛則不可下內

涸則不宜汗頭汗之證更不可再汗也其或瘀血在裏  
與夫熱入血室虛煩水結皆令頭汗此爲熱鬱於內而  
上達或吐或下以去其邪設或小便不利內外關格而  
頭汗則爲陽脫誤下溼家額上汗出而喘小便難小便  
利亦爲陽脫二者皆不療矣百問表實裏虛故頭汗不  
可下發黃頭汗及項而止小便難引水漿此溼也茵陳  
蒿茵陳五苓散

心結胸心忪滿無大熱頭汗出半夏茯苓湯

譫語頭汗是爲血熱屬陽明用承氣湯若心中懊憹而

頭汗者梔子豉湯

半表半裏有柴胡證並小柴胡湯熱寒往來微惡寒爲表脇下滿大便堅爲裏

手足汗

四肢者諸陽之本熱聚於胃則津液傍達於手足也蘊熱則燥煩譫語挾寒則水穀不分是又承氣理中之不同

陽明病手足絜絜汗出譫語大便難與承氣湯

陽明中寒不能食小便不利手足汗出大便初硬後溏

水穀不分與理中湯一法用猪苓湯

### 盜汗

盜汗者睡着則汗出覺則便不出矣雜病責於陽虛傷寒責在半表半裏故知膽有熱也

陽明病脈浮緊潮熱盜汗柴胡桂枝湯

脈浮大欲眠目合則汗小柴胡湯又柴胡桂枝湯

### 煩熱

邪熱傳裏不經發汗吐下則爲煩熱與發熱似同而異經曰病人發熱汗出則解如未作膈熱但當和解微熱

而已若心下滿而煩則有吐下之異宜別其證之虛實而爲劑之輕重也先煩而悸者爲實先悸而煩者爲虛虛煩而心中欲嘔吐鬱悶之狀

太陽病心煩自汗小便數者不可與桂枝湯宜芍藥甘草湯服桂枝湯後出汗後煩渴者脈洪大白虎加入參湯

陽明病心煩喜嘔壯熱往來心下悸小便不利小柴胡湯加茯苓傷寒二三日心中悸而煩小建中湯

發汗後解半日許復煩脈浮數者可更發汗桂枝湯

而煩渴者飲則吐水五苓散不愈竹葉石膏湯

下後晝煩夜靜不渴不嘔無表證脈微沉乾薑附子湯  
若懊懜與梔子豆豉湯

若發汗若下之病仍不解而煩燥者茯苓四逆大下後  
六七日不大便不解腹滿痛者有燥屎大承氣湯吐汗  
下後虛煩心下痞滿氣上衝胸頭眩身爲振搖茯苓桂  
枝白朮甘草湯

腎傷寒表裏無熱但煩憤不欲見光明有時腹痛其脈  
沉細四逆湯

煩燥

煩爲擾亂而燥爲憤怒燥爲先煩而漸至燥也傷寒煩燥則有陰陽虛實之別心熱則煩陽實陰虛腎熱則燥陰實陽虛煩則熱之輕燥則熱之甚也有邪在裏而煩燥者有不煩便作燥悶者此爲陽盛隔陰欲於泥水中卧飲水不得入口也

其或結胸證共而煩燥吐利四逆湯煩燥下利發熱厥逆煩燥不得眠惡寒燥攣脈不出而燥者皆爲不可治矣



太陽中風脉浮緊熱而惡寒身疼痛不汗出而煩燥大  
青龍湯

得病二三日脉弱無太陽證柴胡湯

證煩燥心下硬能食小承氣湯以和之心中悸而煩燥  
者小建中湯

惡風自汗脉濡弱而煩燥者皆且用此法

但發熱六七日渴欲飲水者五苓散無熱但狂言煩燥  
者五苓散水調服探吐之

陽明病不大便繞臍痛煩燥承氣湯下之

少陽吐利厥逆煩燥欲死吳茱萸湯

厥逆脉沉自利煩燥不得眠苦連雞子湯黃連阿膠湯  
下後復發汗晝則煩燥不得眠夜而安靜不嘔不渴無  
表證脉沉微身無大熱乾薑附子湯

發汗若下之病仍在不去煩躁者茯苓四逆湯

陰極發燥或陰毒火邪投熱藥反劇者不可用涼藥燥  
甚仍與熱劑用四逆湯輩

### 懊懣

懊懣者心中懊懣懣懣鬱悶不舒之貌蓋由表證誤下

正氣內虛陽邪內陷結於心胸之間甚則爲結胸也邪  
在心胸則宜吐熱結胃腑則宜下不可拘也發汗吐下  
之後虛煩不得眠甚則反覆顛倒心中懊懣梔子豉湯  
舌上白胎肌不能食虛煩不眠頭汗懊懣上同

短氣煩燥咽硬胸中懊懣大陷胸湯

陽明病下之後懊懣而煩中有燥屎宜承氣湯

陽明無汗小便不利心中懊懣者必發黃宜茵陳蒿湯

### 身痛

身痛太陽表證也雖曰表邪未解而有發汗溫經先後

之不同自利脉沉爲陰病身痛其身重者屬乎陽明爲有風也又有陽邪內行不榮於表是又不可不知

太陽身痛脉浮緊無汗麻黃湯或尺脉遲爲無血先用小建中湯候尺脉浮却用麻黃湯

下利脉沉身痛宜四逆湯輩

發汗後身痛脉沉遲桂枝芍藥人參湯

一身盡痛發熱而黃七八日後結熱在裏乃攻其表溫裏四逆湯攻表桂枝湯

霍亂後身痛不休桂枝湯

溼家身疼痛不可發汗發汗則成痙葛根桂枝湯  
凡中溼身痛有本條

四肢拘急

拘急者手足不能自如屈伸不便如踈卧惡風之貌四  
肢者諸陽之本蓋因發汗亡陽陽虛是有其證也傷寒  
脉自汗出小便數心煩惡寒脚攣急芍藥甘草湯小便  
難者桂枝加附子

太陽病發汗遂不止惡風小便難四肢微急難以屈伸  
桂枝加附子湯

吐利汗出發熱惡寒四肢拘急手足厥冷四逆湯

### 咳嗽

咳者聲欬俗謂之嗽肺主氣肺爲邪所乘氣逆而不下也故令咳嗽有肺寒而咳者有停飲而咳者有邪在半表半裏而咳者治各不同其水咳二證不可不辯小青龍太陽之表水也十棗湯太陽之裏水也直武湯水證之水氣也蓋水與表寒相合而咳則小青龍當汗之水與裏寒相合而咳則真武湯溫之裏癖合水動肺而嗽十棗湯所以下之也

太陽病身熱咳嗽乾嘔喘而利小青龍湯有加減法惡寒身痛只依本方身涼咳嗽乾嘔爲利心下痞滿引脇下痛十棗湯

四肢痛重腹痛下利咳嗽或嘔真武湯有加減之法少陽病寒熱往來胸脇硬滿而痛咳嗽小柴胡湯有加減之法

少陽咳嗽四逆湯腹痛下利咳嗽中滿而嘔大半夏湯喘

傷寒發喘有邪在表者有邪在裏者有水氣者在表者

心腹濡而不堅外證無汗法當汗之在裏者心腹脹滿  
外證有汗法當下之其水氣者心下怔忡是以有青龍  
湯之證或注喘或汗出而喘宜發之雖然喘特病之常  
也其或直視譫語汗出髮潤身汗如油皆不可治

太陽病無汗而喘麻黃湯

陽明病汗出不惡寒短氣腹滿潮熱而喘小承氣湯太  
陽陽明合病喘而胸滿不可下宜麻黃湯

誤下太陽利不止脉促有汗而喘葛根麻黃黃芩湯無  
汗而喘麻黃杏仁甘草石膏湯



水氣喘咳乃太陽汗後飲水多而水停心下小青龍湯  
去麻黃加杏仁小腹痛者去麻黃加茯苓陰病喘促者  
反陰丹

### 氣逆

氣逆者氣自腹中時時上衝也蓋因太陽病下之表邪  
乘虛傳裏裏不受邪則氣逆上行仍在表也當復汗之  
厥陰客熱氣上衝心此熱在裏而氣上也若病如虛羸  
少氣氣逆欲吐者又動氣發汗而氣上衝者此正氣虛  
而氣逆也當依法調治之脉沉緊者不可汗

太陽病下之後其氣上衝者可與桂枝湯不上衝者不可與之病如桂枝證頭不痛項不强寸脉浮微胸中痞硬氣上衝咽喉不得息此爲胸中寒瓜蒂散吐之脉微者不可吐吐則心口逆滿氣上衝胸起則頭眩脉沉緊發汗則動經身爲振搖茯苓白朮桂枝甘草湯

動氣發汗氣上衝者李根湯

病後虛羸少氣氣逆吐者竹葉石膏湯

### 短氣

短氣者呼吸短促而不能相續也千金方云少氣不足

以息也金匱要略曰短氣不足以息者實大抵心腹脹滿而短氣者邪在裏而爲實心腹濡滿而氣短者邪在表而爲虛又有停水心下亦令短氣隨證攻治無不愈矣

短氣潮熱腹滿而喘此爲外欲解而裏欲實大柴胡湯小承氣湯

風溼相搏汗出短氣小便不利惡風不欲去衣其邪在表甘草附子湯

食少飲多水停心下短氣小半夏湯

身涼乾嘔短氣汗出不惡寒此表解裏有水十棗湯  
誤下太陽短氣煩燥心中懊懣爲結胸大陷胸湯及丸

### 咽乾

邪熱聚於胃腑消耗津液故口乾熱而渴也經曰少陰  
病故口燥咽乾者急下之若下口燥咽乾而渴脉沉者  
急溫之又有漱水不下咽者若見表證必衄爲邪熱在  
經也以血氣俱多經中熱甚迫血妄行而作衄者無表  
證加之胸腹滿而如狂者又爲畜血在內也

陽明口燥咽乾無大熱背微惡寒煩渴白虎加人參湯

少陽口燥咽乾小柴胡湯

少陰口燥咽乾而渴急下之用承氣湯

陽明病口燥欲漱水不嚥者必衄黃芩芍藥湯漱水不咽發狂輕者犀角地黃湯甚者抵當湯

### 渴

渴者裏有熱也津液爲熱所耗故令渴也傷寒六七日傳至厥陰爲消渴者渴飲水多而小便少乃熱能消水也朱氏曰脉浮而渴屬太陽有汗而渴屬陽明自利而渴屬少陰至於厥陰則又熱之極矣太陽無汗若渴忌

白虎宜柴胡湯陽明多汗而渴戒五苓宜竹葉石膏湯  
若先嘔後渴則爲欲解當與之水先渴後嘔則爲水停  
屬赤茯苓湯當從此議勿令悞也

太陽病發渴脉浮表不解心下有水氣小青龍湯去半  
夏加瓜蒌服桂枝湯

汗出後煩渴甚者白虎加人參湯

小便不利而渴五苓散

身熱惡風手足溫脇滿而渴小柴胡去半夏加瓜蒌陽  
明發渴則有汗脇下硬不大便而嘔舌上白胎小柴胡

湯加減同用

若汗少小便不利脉浮而渴五苓散渴而飲水嘔者同  
發黃頭汗出小便不利渴飲水漿茵陳蒿湯茵陳五苓  
散

少陽發汗則自利咳而嘔引水飲猪苓湯

下利渴欲飲水白頭翁湯

下利脉數而渴者自愈不愈必下宜黃芩散

病人脉微細欲吐不吐心煩但寐小便白下利而渴四

逆湯

陽毒

大熱大渴黑奴丸中暑發渴白虎加人參湯

胸脇滿痛

胸滿者胸膈間氣塞閉也非心下滿者脇肋下氣填脹滿也非腹中滿蓋邪自表傳裏必先自胸脇以至心腹而入胃是以胸滿多帶表證宜發汗脇滿者多在半表半裏之間宜和解至於邪結胸中而爲實者又須湧吐之也

太陽病下後脉促胸滿桂枝去芍藥湯病在於胃氣芍



藥入榮故去之

陽明病喘而胸滿猶帶表證不可下與麻黃湯麻黃杏仁甘草石膏湯

胸脇俱滿或脇下硬痛或嘔吐舌上白胎或不大便並屬小柴胡湯

傷寒五七日往來寒熱胸脇若滿默默不飲食心煩喜嘔或脇下痞硬柴胡加牡蠣湯

傷寒七八日下之胸滿煩驚小便不利譫語一身盡痛不可轉側柴胡加龍骨牡蠣湯胸中痰實瓜蒂散吐之

胸膈不快填滿閉塞唇青手冷脉細沉少情緒或腹痛  
此名太陰

### 結胸

經曰病發於陽而反下之熱入因作結胸註曰發熱惡  
寒者發於陽也外證項強心下滿硬而痛是也此爲實  
邪在裏法當下之若脉浮大若表證若水氣填不可下  
亦有不因下而心下硬滿者經曰病人手足厥脉乍緊  
邪結胸中心滿而煩飢不欲食當吐之是則病在胸中  
也經曰陽明病心下硬滿不可下下之利不止而死是

則邪氣自表傳裏留於心下未全爲實法當吐之故有此戒其或結胸證具而煩燥者不治

結胸寸脉浮關尺皆沉緊宜下若脉浮大或有表證先用小柴胡湯表已解下之大結胸不按而痛連臍腹痛硬不可大陷胸湯或大峻用丸

小結胸按之而痛心下硬小陷胸湯

熱實結胸懊懜煩渴心下痛少與大陷胸湯

寒實結胸無熱證三物白散枳實理中丸

痞

經曰病發於陰而反下之因作痞註云無熱惡寒者發於陰也輕於結胸者心下滿而不痛按之則濡是其虛邪留滯故但滿而不痛也惟枳桔最良欲攻之只從表證解而後可

痞者關脉多沉枳實理中丸半夏瀉心湯關脉沉者三黃湯瀉其肝若惡寒者附子瀉心湯服此湯痞不去煩渴小便不利五苓散

下後復汗心下痞而惡寒表不解不可攻痞先與桂枝湯表解乃攻痞三黃湯

表未解而心下妨悶曰支結柴胡桂枝湯胸脇滿而微  
結小柴胡湯加乾薑牡蠣表證未罷因攻之脇熱而利  
心下硬爲表裏俱病桂枝人參湯

下利心下痞硬乾噎食臭腹鳴甘草瀉心湯生薑瀉心  
湯治法通用桂枝人參湯若下利不止則治下焦赤石  
脂禹餘糧湯又不止只利小便五苓散

發熱不解嘔吐不利心下痞硬大柴胡湯吐汗下後噎  
氣痞硬旋覆代赭湯

若咳逆氣虛用四逆湯

胃寒先宜理中丸後用旋覆代赭湯

腹滿

脾爲中央之土所以腹滿多屬太陰也常病者爲表實從下之時減者爲裏虛當溫之若解表內不消非大滿尤生寒熱朱可下是邪全未入腑若大滿大實兼有燥屎雖得之四五日亦爲可下謂邪已入腑也大抵陽熱爲邪則腹滿而咽乾陰邪爲寒則腹滿而吐利食不下若雖經吐下後而腹滿者治法又各不同是又不可不知也

太陽誤下因時腹滿而痛桂枝加附子湯痛甚桂枝加大黃湯

陽明發熱腹滿微喘口苦咽乾或不大便譫語者並小柴胡湯噦而小便難加茯苓

三陽合病腹滿身重難以轉側譫語口中不仁小柴胡湯有汗白虎湯

太陰腹滿吐食不下枳桔理中丸

少陰病六七日腹脹滿不大便急下之大承氣湯

腹脹痛者脾不勝水水與氣搏皮肉之間腸中漉漉有

明理經言 卷六  
三  
聲小半夏茯苓湯加桂枝下利腹滿身疼痛先溫其裏  
四逆湯後攻其表桂枝湯

發汗後腹滿當溫厚朴半夏生薑人參湯吐後腹滿當  
下少與調胃承氣湯下後腹滿宜梔子厚朴湯腹脹滿  
者陰陽不和桔梗半夏湯

### 腹痛

邪氣入裏與正氣相搏則爲腹痛蓋陽邪傳裏而痛者  
其痛不常當以辛劑和之陰寒在內而痛者則痛無休  
時欲作利也當以熱劑溫之有燥屎宿食爲痛者則煩



而不大便腹滿而痛也則後用下經曰諸痛爲實痛隨利減此皆爲裏證而所治各不同矣又當隨證施治

傷寒四五日腹中痛若轉氣不趣小腹者此欲自利也

### 四逆湯

少陰腹痛四逆或咳或悸或小便不利或瀉利下重并四逆散

下利青穀脈微欲絕通脈四逆湯腹痛小便不利真武湯

胸中熱胃中有邪氣腹痛欲嘔吐者黃連湯

大便實痛者關脉實腹滿不大便桂枝加大黃湯大小承氣湯選用之

### 小腹滿

小腹滿者臍下滿是也若胸滿心下滿腹滿皆爲邪氣而非物今小腹滿皆爲有物而非氣小便利者則爲畜血之形小便利者乃是溺瀦之證滲利之劑宜分兩途經曰病人素有痞氣連在臍傍痛引小腹入陰筋者名臍結也死

太陽病不解熱結膀胱其人如狂小腹急結桃仁承氣

湯

太陽病六七日表證在脉微沉不結胸發狂小腹硬滿  
小便自利抵當湯

太陽病目黃脉沉結小腹硬小便不利者五苓散陰陽  
易小腹痛燒裊散

病者手足厥冷眞武湯不結胸小腹滿按之痛者此冷  
結在膀胱關元宜灸關元穴

嘔吐

嘔者聲物俱出者也吐者無聲而但出物者也故仲景

復重言乾以別之則嘔爲有物明矣乾猶空也但空嘔而無所出耳然嘔吐俱有物出較之輕重則嘔甚於吐蓋表邪傳裏裏氣上逆故嘔吐而水穀不下也有胃熱脉弦數口舌煩渴有胃寒脉弦遲逆冷不食小便利有水氣先渴後嘔膈間怔忡有膿血喉中腥奔逆上衝不須治之嘔膿盡自愈是四者不可不辯大抵邪半在表半在裏則多嘔吐及其裏熱而嘔吐者亦有之故經曰嘔多雖有陽明證不可攻之爲其氣逆未收斂爲實也設或嘔而脉弱小便復利身惟熱而見厥者難治以其

虛寒甚也

太陽少陽合病自利而嘔黃芩加半夏生薑湯

太陽陽明合病當自利若不利但嘔葛根加半夏湯

傷寒胸中熱胃中有邪氣腹痛氣逆欲嘔吐者黃連湯

太陽病發熱汗出心下煩鬱痞硬不利嘔吐大柴胡湯

三陽發熱而嘔逆小柴胡湯嘔而渴者猪苓湯五苓散

先嘔後渴此爲欲解宜與水解先渴後嘔而水停心下

赤茯苓湯

少陰病又吐但欲寐五六日自利而渴小便色白四逆

湯加生薑

少氣或咳或悸身痛自利真武湯去附子加生薑膈上寒飲乾嘔吐涎沫四逆湯

若吐利手足厥冷煩燥甚者吳茱萸湯

食穀欲嘔者屬陽明也上同得湯反劇者屬上焦橘皮湯小柴胡湯似嘔似噦似喘心下憤憤大橘皮湯汗下後關脉遲緩而吐爲胃寒理中丸

瘥後虛煩嘔吐竹葉石膏湯加生薑汁屢經汗下食氣膈塞食入卽吐乾薑黃芩黃連人參湯

汗後水藥不入口者四逆半夏茯苓湯金匱要略曰諸嘔吐穀不下半夏湯嘔吐脉滑數或洪發熱茅根湯

乾嘔

乾嘔者嘔而無物出也大抵熱在胃脘與穀氣并熱氣上薰心下痞結則有此證太陽汗出乾嘔桂枝湯主自汗也少陰下利乾嘔薑附湯主下利也厥陰吐沫乾嘔吳茱萸湯主涎沫也邪去則吐自止矣若有水氣二證又當以表裏別之

傷寒表不解而心下有水氣乾嘔身熱微喘或自利小

青龍湯主之

不發熱不惡寒肋痛欬而利乾嘔者十棗湯下之

自汗頭痛乾嘔桂枝湯

少陰下利乾嘔脈微白通湯下利不止乾嘔而煩厥逆  
無脈白通加豬膽汁湯

惡寒外熱脈微欲絕乾嘔通脈四逆湯

膈上有寒飲乾嘔亦屬少陰四逆湯

乾嘔吐痰沫頭痛吳茱萸湯得此湯反劇者與小柴胡  
湯



乾嘔自利黃芩湯半夏生薑湯太陽中風陽浮陰弱自汗惡風寒發熱鼻鳴乾嘔者桂枝湯乾嘔噦若手足厥者橘皮湯

欬逆噦

夫咳逆者俗謂之吃忒是也纔發聲於喉間則遽止呶呶然連續數聲然而短促不長古人謂之噦者非也噦與乾嘔無異但其聲濁惡而長然皆有聲而無物病至於噦則危難治矣大抵餽近於噦餽者但胸間氣塞不得下通噦則惡濁之聲遠於外矣蓋因胃氣本虛汗下

明玉經言 卷六  
太過或腹飲水水寒相搏虛逆而成經曰陽脉浮則爲  
氣詢又曰脉滑則爲噦此爲醫咎責虛取實之過也又  
有熱氣擁鬱上下氣不得通而噦者輕則和解之通利  
之甚則溫散之設若不尿腹滿而噦者咳逆脉散而無  
倫者雖神醫不能措手與傷寒咳而氣逆者又不同也  
若將噦或紊於噦與咳而氣逆則誤人多矣臨病之際  
宜明辯之欬嗽大便少與大承氣湯下之蓋由熱氣衝  
膈肝肺故耳若便軟瀉心湯胃氣虛而衝脉逆也若脉  
散者不治咳逆潮熱小柴胡加橘皮生薑湯

厥逆不止烏荅湯有寒者羌活附子散

傷寒表不解心下有水氣乾嘔發熱而咳或簡小青龍湯去麻黃加附子

寸口脈浮大醫反下之爲逆又飲冷水令汗大出水得寒氣冷必相搏其人卽簡荳蔻湯

噦而腹滿大便不利先宜半夏生薑湯次用承氣湯小便不利猪苓湯

陽明中風脈浮弦小便難潮熱而噦小柴胡湯加茯苓嘔噦手足冷逆小橘皮湯

若胸滿虛煩大橘皮湯

胃氣寒者吳茱萸理中湯溫中湯

金匱要略曰噦逆者橘皮竹茹湯主之

噦不止者橘皮乾薑湯半夏生薑湯退陰散子宜消息  
用之

溫病熱未除重被暴寒入胃蘊結不散變噦梓皮飲子  
溫病有熱飲水暴冷作噦茅根葛根湯

溫病胃冷變噦茅根橘皮湯

溫病有熱飲水暴冷枇杷茅根湯

下利

傷寒表邪傳裏裏虛助熱則自下利又有不應下而便  
攻之內虛協熱亦爲下利要當別其陰陽三陽下利自  
太陽下利手足溫少陰厥陰下利身涼無熱此大概也  
自利清穀不渴小便色白微寒厥冷惡寒凡此皆寒渴  
欲飲水溺色如常泄下赤黃發熱後重凡此皆熱蓋因  
風邪入胃水來侮土故令暴下或溫或攻或清下焦或  
利小便隨證施治但不宜發汗耳邪氣內攻復泄其津  
液胃氣轉虛必成脹滿若夫下利譫語而目直視下利

厥噪不得眠下利發熱厥而自汗下利厥冷無脉灸之不温而脉不出下利日數十行其脉反實皆爲不治之證五者最忌者也

太陽陽明合病下利頭目痛鼻乾脉浮葛根湯

太陽少陽合病下利頭痛胸滿乾嘔脉浮弦黃芩湯嘔甚加半夏生薑

少陽陽明合病下利身熱胸脇滿乾嘔往來寒熱脉長大而弦弦而爲負負者死長大不弦爲順大承氣湯下之

滑而數爲有宿食亦從下之太陽病未解而欲下之遂熱而利心下痞硬表裏不解者桂枝人參湯

太陰自利不渴四逆湯理中湯朮附湯

少陰下利不渴腎虛飲水自救脈微者白通湯

厥逆無脈者白通加豬膽汁湯四逆湯

少陰下利渴而嘔止煩不得眠者豬苓湯

少陰下利咽痛胸滿心煩者豬膚湯

自利清水心下必痛口中乾噪此不可溫宜用下大承

氣湯

傷寒醫下之續得下利清穀身痛者急當救裏宜四逆湯清便自調急當救表宜桂枝湯

胃熱利白腹垢臍下必熱便下垢膩赤黃或渴黃芩湯  
白頭翁栝皮湯通用之白虎湯

胃寒利白鴨溏臍下必冷腹脹滿便中清白或清穀四逆湯理中湯寒毒下利面帶陽者下虛也下利譫語有燥屎也脉不微細小承氣湯

尺脉弦腸鳴泄利腹痛者冷痛也小建中湯三部平心硬而下利者腸胃積結也宜下之大承氣湯



下利脉滑當有所去下之乃愈大承氣湯下利脉大者  
虛也以其強下之故也設脉浮革因爾腸鳴者當歸四  
逆湯

下利瘥後至其年月復發者以痛不盡故也宜下之大  
承氣湯

便膿血

衝脉爲血之海卽血室也男女均有此血氣均有此衝  
脉衝之得熱血必妄行在男子則爲下血譫語在婦人  
則爲寒熱似瘧皆爲熱入血室逼血下行則血熱而利

也挾血之脉乍澁乍數或伏或沉血熱交併則脉洪盛大抵男多於左手女多於右手見之又有陰寒爲病下利便膿血者乃下焦虛寒腸胃堅固清濁不分而利下膿血也二者一爲挾血一爲陰寒臨病宜精別焉

太陽病不解熱結膀胱其人如狂而血自下者愈不愈用桂枝湯明理論抵當湯

陽明病下血譫語胸脇滿如結胸夜則見鬼此爲熱入血室小柴胡湯

少陰病下利便膿血者桃花湯

腹滿身熱下如魚腦曰溼毒桃花湯地榆散黃連阿膠湯

下後無表裏證脈數不解散消穀易飢多日不大便此爲瘀血桃仁承氣湯抵當湯或小柴胡湯加桃仁大黃下焦畜火其人如狂小腹急結小便必利抵當丸

### 四逆

手足不溫謂之四逆邪在表則手足熱邪在表裏之間則手足溫至於邪傳少陰則手足有逆冷之證與厥陰又相遠也然自熱而至溫自溫而至厥乃傳經之邪輕

則四逆散重則承氣湯下之非若得病手足便逆而不  
溫者四逆湯溫之則爲陰經受邪而陽氣不足也其或  
吐利煩燥厥逆踰卧皆屬少陰又爲不治之證

少陰病四逆其人或咳或悸或小便不利或腹中痛滿  
或利下重並四逆散

初病以來厥冷四逆卽四逆湯

手足逆冷大便閉小便赤或大便黑色脉沉而滑此爲  
陽證以白虎湯甚者大承氣湯

厥逆

陽氣伏藏陰氣越出陰陽不相順接所以厥也若先熱而後厥者乃熱邪伏於內也先厥而後熱者乃陰退而陽得復也

若始得病便厥者是陽不足而陰勝也熱浮於內者其脈沉而數狂言發渴露手揚衣燥不得眠或大便閉初便厥者其脈沉遲而弱醒醒而靜惡寒引衣或下利清穀也其或惡寒踈卧煩燥下利不知人皆爲惡候故曰逆也

先發熱而後厥者揚手擲足煩燥飲水畏熱頭汗大便

閉小便赤怫鬱昏悸當下失下血氣不通所以謂熱深則厥者此也大柴胡湯小承氣選而用之

初病便厥足攣惡寒引衣自蓋不渴大小便自利默默而惶惶諸四逆選用之

傷寒厥而心下悸者宜先治悸茯苓桂枝湯後治厥四逆湯吐利厥逆煩燥欲死者吳茱萸湯當歸四逆湯仍灸大谿

### 不大便

不大便謂大便難也皆因發汗利小便耗其津液以致

腸胃乾燥而轉屬陽明裏者多矣其小便自數者則爲  
津液偏勝故使大便亦難也若下若發汗小便數大便  
硬者與承氣湯和之謂津液內竭也又有不宜便下者  
至於脉浮脉虛惡寒此尤帶表邪乃不可下其嘔吐爲  
邪未入腑雖有陽明證不可攻之小便清者知邪不在  
裏仍在表也大便秘小便少不轉失氣此內無燥屎也  
但初硬後溏爾陽明脉浮或經發汗小便自利不大便  
者亦津液內竭宜蜜導煎通之經曰其脉浮而數能食  
不大便此爲實名曰陽結也宜大柴胡湯若不了了得

屎而解其脉沉而遲不能食身體重大便反難名曰陰結也宜金液丹

傷寒不大便六七日頭痛有熱者小承氣湯

病人不大便六七日繞臍煩燥發作有時者此爲屎硬不得大便小承氣湯

夫病陽明者下之則硬汗多極發其汗則亦硬並小柴胡湯

陽明病脇下硬滿不大便而嘔舌上白胎小柴胡湯  
少陰病六七日腹脹不大便急下之大承氣湯



若發汗若利小便津液內竭大便自難者不可攻之無  
陰陽强大便者下之必清穀脹滿並用蜜導煎

譫語鄭聲附

經曰邪氣盛則實精氣奪則虛故實則譫語虛則鄭聲  
傷寒胃中熱盛上乘於心爲熱冒則神識昏迷妄有所  
見而言也輕者睡中呢喃重者不睡亦語亦有譫語者  
有獨語者有語言不休者有言亂者凡此見其熱之輕  
重也大抵熱入於胃水涸屎燥必發譫語又有被火劫  
者有亡陽者名各不同但氣短者死脉自和則愈或喘

滿氣逆而上奔自利氣脫而奪下皆爲逆也譫語者脉  
洪數大便閉小便赤手足溫與調胃承氣湯

胃實譫語身熱汗多便難或潮熱諸承氣湯選用之

發汗多亡陽譫語身自和不可下柴胡桂枝湯

下利譫語爲有燥屎脉不微細小承氣湯

利不止者不治

三陽合病譫語者脉滑右身重難以轉側口中不仁面  
垢遺尿不可汗下與白虎湯

傷寒大熱乾嘔呻吟錯語不得眠犀角解毒湯

得病無熱但狂言煩燥不安精采不與人相當與五苓散二錢以新汲水吐之則愈一法用猪苓湯

瘀血狂言譫語漱水大便黑色小便多身黃腹滿此爲當汗不汗皆熱在裏輕者犀角地黃湯甚者桃仁承氣湯抵當丸

婦人熱入血室晝靜夜譫如見鬼狀小柴胡湯

陽明病其人喜忘必有瘀血抵當丸

鄭聲者重語也又爲不正之音也傷寒鄭聲如鄭衛之音不正也蓋因汗後若病人本音失而正氣虛則鄭重

語不知高下乃精氣奪之候也其脉微細二便利用白  
虎湯

小便不利小便難附

邪氣聚於下焦結而不散甚則小腹硬滿而不痛此小  
便所以不通大抵有所不利者行之所以滲泄也若飲  
水過多下焦蓄熱或中溼發黃水飲停留皆以利小便  
爲先惟汗後亡津液胃汁乾與陽明汗多者則以利小  
便爲戒設或小便不利而見其汗者乃爲陽脫關格之  
疾矣

飲水過多下焦畜血熱小便不利脉浮者用五苓散脉  
沉者猪苓湯

太陽病身黃脉沉者猪苓湯

太陽病身黃脉沉結小腹硬小便不利者爲亡血也五  
苓加茵陳嘔而發熱胸滿心下怔忡小便不利者爲亡  
血也五苓加茵陳茯苓

少陰病四逆或小便不利四逆散加茯苓

陽明病無汗小便不利心下懊憹者身必發黃五苓散  
加茵陳經曰虛則小便難陰虛者陽必溲之由膀胱受

熱致小便赤澁而不流利也又曰雖不大便也六七日而小便少者但初硬後溏未定或硬攻之必溏縱小便多屎定硬方可攻之乃胃中有穀不別雖通而不能也陽明中風脉浮弦大身黃鼻乾氣短腹滿潮熱時噦心脇痛小便難小柴胡加茯苓

太陽病小便利者以飲水多必有心下悸茯苓白朮甘草湯小便少者必裏急猪苓湯

小便自利小便數遺溺附

小便自利者爲津液漏滲大便必硬宜以藥微下之其

陽明自汗者復發其汗使津液內竭屎雖硬尤不可攻  
縱使大便難蜜導煎導之太陰當發身黃其小便自利  
者則溼熱內泄不能發黃惟血證則腹急而如狂腎與  
膀胱虛則不能約制水液二者皆小便自利若腎與膀  
胱虛而挾熱熱則水道澁則小便不快故澁淋而數起  
也若自汗而小便數者雖有表證又不可用桂枝謂亡  
走津液也

太陽病小便自利以飲水多心下悸茯苓桂枝茯苓甘  
草湯

太陽自汗四肢拘急心煩微惡寒脚攣急小便數誤服  
桂枝湯得之便厥與甘草乾薑湯甘草芍藥湯

脉浮自汗小便數胃不和譫語者少與調胃承氣湯陽  
明脉浮而澁浮則胃氣強澁則小便數浮澁相搏大便  
則難其脾爲約宜麻仁湯

少陰四逆小便自利或色白爲虛寒四逆湯或真武湯  
去茯苓旣吐且利小便復利而大汗出下利清穀內寒  
外熱脉浮欲絕者四逆湯

舌上白胎臟結附



經曰舌上如胎者以丹田有熱胃中有寒謂寒氣初傳人裏也舌乃心之官法應南方火色本紅乃邪氣在表舌則無胎又邪氣在裏津液練搏則舌上生胎而滑熱氣漸深其舌胎燥而澁熱聚於胃其舌胎爲之黃矣若間黑色則熱已深病已極篤經曰舌熱病口乾舌黑者死乃腎水刑於心火也

脉陰陽俱緊曰中氣出唇口乾燥踈卧足冷鼻中涕出舌上滑胎者勿妄治也到七八日以來其人微發熱手足溫者此爲欲解或八日以上反大發熱者此爲難治

設使惡寒者必欲嘔也小柴胡湯加生薑

腹內痛者必欲利也理中湯

太陽誤下胃中空虛客熱動膈懊懣舌胎梔子豉湯

少陽病脇下硬滿不大便而嘔舌上白胎小柴胡湯

陽明病舌上生胎五苓散舌黃者當下之金匱要略曰

舌黃者未可下黃自去也

臟結者臟氣秘結而不流布也一息不運機緘窮一毫不續穹壤判臟其可結乎外證如結胸狀但欲食如故時時下利爲異耳其脉寸浮關沉而緊陰筋引臍腹俱

痛是也病人脇下素有痞連臍結無陽證不往來寒熱  
其人反靜舌上胎滑者不可攻也刺關元灸之亦可仍  
與小柴胡湯加生薑

### 咽痛

咽喉不利或痛或癢不可納食皆毒氣上衝所致經曰  
太陽病下之脈緊者必咽痛以太陽之邪傳於少陰也  
少陰之脈循喉嚨挾舌本少陰咽痛脈浮遲厥冷或吐  
利亦屬少陰並不可汗下用桔梗湯猪苓湯甚者半夏  
散通脈四逆湯去芍藥加桔梗汗不止藁本溫粉撲之

咽中生瘡不能言語聲不出者苦酒湯若傷寒六七日  
大下後寸脈沉遲尺脈不至咽喉不利腫膿血手足厥  
利不止者難治宜麻黃升麻湯

腎傷寒一證乃非時暴寒伏於少陽之經頭疼腰痛脈  
微弱初咽痛以傷寒後必下利咽痛半夏桂枝湯卽半  
夏散利四逆湯

陽毒咽痛見發斑條咽中閉塞烏扇湯口瘡赤爛蜜浸  
黃栢噙咽痛甚者升麻六物湯

頭眩

少陽居表裏之間表邪傳裏表中陽虛故頭眩也又有發汗吐下後而眩者亦陽虛所致也若少陰病下利止而頭眩時自冒者此虛極而脫而風家亦有眩者風主運動故也其或諸逆發汗劇者言亂目眩而死也

太陽病若下之因復發汗以此表裏俱虛其人必眩冒冒家汗自出而愈

陽明病但頭眩不惡寒故能食而咳茯苓白朮甘草桂枝湯

少陽之爲病口苦咽乾目眩小柴胡湯

太陽病發汗汗出不解其人仍發熱心下悸頭眩身瞤動振振欲擗地眞武湯

吐汗下後虛煩脈微沉緊心下痞脇下動氣咽喉眩冒身搖筋脈動惕久而成痿茯苓桂枝白朮甘草湯痿用栝蘘湯

鼻衄

經絡熱盛迫血妄行出於鼻者爲衄血也雖是熱其邪尤在經然亦不可發汗經曰以桂枝麻黃治衄非治衄也乃欲散其經中邪氣耳衄血故爲欲解若衄不止而

頭汗出其身無汗及發熱汗不至足者又爲惡證當明辯之

太陽證衄血及服桂枝湯後致衄者爲欲解也屬犀角地黃湯衄不止茅花湯無汗能食者卽欲衄黃芩湯

衄家不可發汗汗出必額上陷脈緊急直視不能盼不得眼芍藥地黃湯

陽明病渴欲漱水不嚥者必衄黃芩芍藥湯

不因下而自利加衄者麻黃升麻湯脈浮大欲發熱下利鼻衄乾嘔者黃芩芍藥湯衄煩而復渴欲飲水水入

卽吐先服五苓散次服竹葉石膏湯

少陰病但厥無汗強發之必動其血或從口鼻或自目  
出名下厥上竭爲難治當歸四逆湯仍灸太谿三陰交  
湧泉一法用黑錫丹

### 吐血

諸陽受熱其邪在表當汗不汗致使血毒入臟積瘀於  
內遂成吐血凡見眼閉目紅神昏語短眩冒迷妄煩燥  
漱水狂驚譫語鼻衄唾紅背冷足寒四肢厥逆胸腹急  
滿大便黑利小便頻數皆瘀血證也不必悉具但見一



二便作血證主張初得此病急宜用藥至於陸續不已  
經數時而腹痛者此又難於料理也

經曰服桂枝湯吐者其後必吐膿血犀角地黃湯大下  
後寸脉沉遲尺脉不至咽喉不利唾膿血者麻黃升麻  
湯此有兩證一陽毒一陰毒陽毒用升麻湯陰毒用甘  
桔湯加半夏生薑

血熱者黃連阿膠湯地榆栢皮湯三黃瀉心湯

脉浮發熱反灸之必咽喉吐血救逆湯

咽喉閉塞不可發汗發熱則吐血氣欲絕手足厥冷蹇

卧不能自温當歸四逆湯

心悸

心悸者築築然動怔忡不能自安者是也其證有二一者氣虛一者停飲其氣虛者陽氣內弱心中空虛而爲悸又有汗下之後正氣內虛亦令人悸與氣虛而悸者則又甚也法當定其氣悸也其停飲者由飲水過多不留心下心火畏水不能自安而爲悸也治法必先分水氣雖有餘邪亦先治悸免使水氣散走而成他證也傷寒二三日心中悸而煩小建中湯經云先煩而悸者

此爲熱先悸而煩者此爲虛故宜建中湯

太陽病小便利者以飲水多故心下悸茯苓桂枝白朮甘草湯小便少者必裏急猪苓湯

陽明病壯熱來往心下悸小便不利心煩喜嘔小柴胡湯

太陽病發汗過多其人叉手自冒心下悸欲得按者桂枝甘草湯

發汗後其人臍下悸欲作奔豚茯苓桂枝白朮甘草湯  
太陽病發汗不解仍發熱心下悸頭眩肌體瞤動振振

欲擗地眞武湯

少陽病耳聾目赤腦滿而煩妄加吐下則悸而驚與小建中湯有熱者小柴胡湯

少陰病四逆其人或悸四逆散加桂枝心下有水氣厥而悸當先治水茯苓甘草湯不然水入胃中必不利也傷寒脉結代心動悸炙甘草湯

發黃

內經曰溼熱相交民多病痺痺者單陽而無陰也太陰脾土爲溼熱所蒸則雖見於外必發身黃溼氣勝則如

薰黃而晦熱氣勝則如橘黃而明傷寒至於發黃熱勢已極且與畜血大抵相類小便不利爲發黃小便自利爲畜血也設或寸口無脈鼻出冷氣與夫形如烟薰搖頭直視環口黧黑舉體發黃是皆真臟氣絕也

傷寒瘀血在裏身必發黃麻黃連翹赤小豆湯

太陽中溼發黃身熱頭痛目黃汗出溼在裏五苓散梔子蘘皮湯

溼家之爲病一身盡痛發熱身如熏黃小便不利五苓散小便自利木附湯身煩痛麻黃湯加蒼朮脈浮身重

汗出惡風防已黃耆湯

陽明病脉遲食難用飽飽則微煩頭眩必小便難此欲作穀疸雖下之腹滿如鼓穀疸湯五苓散加茵陳

陽明傷寒發黃易飢短氣腹滿鼻乾咽燥心脇痛小便難潮熱咳嗽頭眩嗜卧脉絃浮大小柴胡湯加茯苓

血證發黃如狂小便多大便黑犀角地黃湯桃仁承氣湯抵當湯選用之

黃疸脉浮滑緊數頭面汗出渴飲水漿小便不利茵陳蒿湯調五苓散

初發黃以瓜蒂末口噉水搐鼻中黃水出愈

### 發狂

難經曰重陰者顛重陽者狂傷寒熱毒在胃併入於心  
遂使神不寧而志不定也故發狂始則少卧不飢妄語  
妄笑甚則登高而歌棄衣而走踰垣上屋皆獨陽亢極  
熱之所致非大下之不能止也亦有當汗不汗瘀熱在  
裏下焦畜血如狂者小便不利時如狂未至於狂耳若  
夫狂言直視便溺自遺其與汗後大熱脉燥狂言不食  
又爲可慮也

重陽卽陽毒脉數實狂走錯語煩燥乾嘔面赤咽痛潮熱發狂或下利黃赤陽毒升麻黃芩湯

時行熱病發狂黑奴丸經曰太陽病不解熱結膀胱其人如狂而血自下者愈若外不解與桂枝湯外已解但小腹急結桃仁承氣湯

血證如狂脉微身黃唇燥嗽水無寒熱小腹滿小便不利大便黑犀角地黃湯甚者桃仁承氣湯抵當丸取下黑物爲効

筋惕肉瞤



內經曰陽氣者精則養神柔則養筋發汗過多津液枯少陽氣偏虛筋肉失所養故惕然而跳矐然而動非溫經助陽不可也張氏故特設真武湯以救之或因發汗吐下後表裏俱虛而有此狀者此又逆之甚矣

太陽病發汗不解發熱心悸頭眩身矐欲擗地真武湯發汗過多或虛弱人微發汗或傷風自汗妄用大青龍湯便有厥逆筋惕肉矐之證並屬真武湯羸者去芍藥有熱者去附子應發而腹中左右有動氣者並不可汗汗之則筋惕肉矐或頭眩汗出不止其後最逆先宜防

風白朮牡蠣湯次服小建中湯十救一二吐下之後心  
下逆滿氣上衝胸起則頭眩脉沉緊身振搖者茯苓桂  
枝白朮甘草湯久而成痿者通用心下痞滿者枳桔湯  
加茯苓甘草

多眠汗下附霍亂

夫衛氣者晝行於陽夜行於陰行陽於寤行陰於寐陽  
氣虛陰氣盛則目瞑故多眠乃邪氣傳於陰而不在陽  
也昏昏閉目陰自闔也默默不言者陰主靜也經曰太  
陽病十日已去脉浮細嗜卧者外已解也鼻乾不得汗

嗜卧者風熱內攻不干乎表故熱氣伏於裏則喜睡也  
三陽合病但欲眠睡目合則汗譫則有熱也見盜汗其  
胃熱亦嗜卧也風溫狐惑亦有是證又當辯之

太陽病十日脉浮細嗜卧者外雖已解設胸滿脇痛鼻  
乾不得汗者小柴胡湯脉但浮者麻黃湯

少陰病但欲寐尺寸俱沉細者四逆湯

少陰病欲吐不吐心煩多寐尺寸俱沉細者四逆湯

少陰病欲吐不吐心煩多寐五六日自利而渴小便白  
者則止矣

其溼霍亂死者少乾霍亂死者多若上不得吐下不得利所傷之物不得出泄壅閉正氣陰陽懸隔喘脹而死素問食飲有節起居有常安得有霍亂也

霍亂頭痛發熱身疼痛熱多欲飲水五苓散寒多不飲水者理中湯吐利汗出脉微惡寒手足厥冷拘急四逆湯腹滿而痛四肢拘急轉筋下利理中湯加附子官桂加減詳見本方

吐利止身痛不休桂枝湯既吐且利小便復利而大汗出下利清穀內寒外熱脉微欲絕者四逆湯

吐利止但汗出而厥四肢拘急不解脉微欲絕者通脉  
四逆加猪膽汁

陰陽易陰陽交

凡男子陽易婦人陰易者病新瘥而動淫慾也其候身  
重氣之小腹絞痛頭不能舉足不能行四肢拘急百節  
解散眼中生花手足拳攣其脉離經皆不可治或榮衛  
精髓竭翁翁少氣手足不能舉者而死吁外傷六氣內  
傷七情其爲害若是也

燒視散猴鼠屎湯竹皮湯乾薑湯青竹茹湯當歸白朮

湯宜選用之

陰陽交者溫病不得發汗汗之復生大熱狂言不食其  
脈燥疾是也皆不治若脈浮數表證尤在可再汗之若  
脈沉實則爲胃實又從汗下之後復熱者同此法再汗  
用桂枝湯再下用承氣湯

拂鬱

拂鬱者陽氣蒸越形於頭面體膚之間聚赤而不散

痲癩

痲癩者痲則急而縮癩則緩而伸熱則生風風主乎動

故筋脉相引而伸縮傷寒至於痲痺可謂危矣能以祛風蕩熱之劑滅其大勢間有可治者治法與瘧同

### 戰慄

戰慄者陰陽爭戰故身爲之搖也邪氣外與正氣爭則爲戰邪氣內與正氣爭則爲慄戰者正氣勝故有得汗而解者慄則不戰而但鼓頷遂成寒逆此陰氣內熱正不勝邪宜薑附四逆湯加灼艾以禦之經曰陰中于邪必內慄也又云邪中下焦陰氣爲慄足膝逆冷便溺妄出皆此類耳方在惡寒條四逆湯甘草乾薑湯若復燥

而不得卧者不治

時行兩感

時行者春應煖而反大寒夏應熱而反大涼秋應涼而反大熱冬應寒而反大溫此非其時而有其氣是以一歲之中長幼之病多相似者此卽時行之氣春感寒邪在肝升麻葛根解肌湯夏感寒邪在心調中益氣湯射香湯半夏桂枝甘草湯秋感溼邪在肺白虎加蒼朮發黃茵陳五苓散冬感寒邪在腎名曰冬溫括蕞湯溫疫通用人參敗毒散升麻葛根湯從春分以後至秋分節



前天有暴寒者皆爲時行寒疫宜用辛溫藥發散  
傷寒兩感半屬於陰半屬於陽臟腑俱受病一日太陽  
少陰俱病則頭疼口乾煩滿而渴二日陽明太陰受病  
則腹滿身熱不欲食譫語三日少陽厥陰俱病則耳聾  
囊縮而厥水漿不入口不知人者六七日死長沙無治  
法但凡兩感病俱作治有先後發表攻裏本自不同後  
人以意消息謂如下利不止身體疼痛當先救裏與四  
逆湯清便自調與桂枝湯然治有先後之說  
太陽先受病在表先解表少陰先受病在裏先救裏先

表者裏不可緩也先裏者表亦不可緩也此通權變之  
論也

不得眠

陽盛陰虛則晝夜不得眠蓋夜以陰爲主陰氣盛則目  
閉而卧安若陰爲陽所盛故終夜煩擾而不得眠也所  
謂陰虛則夜爭者是也汗出鼻乾不得卧則邪在表也  
若胃有燥屎與大熱錯語反大汗胃中液乾而不得卧  
則爲邪在裏也胃不和則卧不得安故宜散熱和胃若  
汗吐下後虛煩不得眠又從梔子豉湯以湧之至於少

陰病熱煩於內而不得眠又宜扶陰散熱若瘥後不得  
眠者則熱氣與諸陽相併陰氣未復也有汗下太過陽  
氣暴虛而不得眠者若無熱證又宜連附湯以退陰復  
陽也此又不可不知

太陽病二三日不能卧但欲起心下結脉微弱者此本  
有寒今反下之若利止必結胸未止三四日復下必協  
熱而利結胸理中丸協熱而利白頭翁湯

少陰利下欬而嘔渴心煩不得眠者猪苓湯此停水也  
若二三日心煩不得眠黃連阿膠湯

病人小便不利大便乍難乍易時有微熱喘冒不能卧者有燥屎也大承氣湯

下之後復發汗晝則煩燥不得眠夜則安靜不嘔不渴無表裏證脉沉微身無大熱者乾薑附子湯

吐下汗後心中懊憹虛煩不得眠梔子豉湯陽勝陰則狂眠亂夢心煩乏氣者酸棗湯陰勝陽則驚悸昏沉大熱乾嘔呻吟錯語不得眠犀角解毒湯中風汗出脉濡而弱厥而且寒燥不得眠小建中湯煩燥竹葉石膏湯瘥後飲酒煩惡乾嘔口燥呻吟錯語不得眠犀角解毒

湯

發斑

大熱則傷血血熱不散裏實表虛熱氣乘虛出於皮膚而爲斑也輕則爲疹子甚則爲錦紋或病本屬陽誤投熱藥或當汗不汗當下不下或汗下未解皆能致此大抵有兩證一者溫毒卽春時發汗下不解邪氣不散故發斑也一者熱病卽冬時溫煖乖戾之氣遇春暄熱而發斑也不可誤汗若發其汗重令開泄更加班爛也然而斑之方萌如蚊跡類焉發斑多見于胸腹蚊跡只在

於手足陽脉洪大病人昏憤先紅後赤者斑也脉不洪  
大病人自靜先紅後黃中蚊跡也其或大便自利拂鬱  
氣短燥屎不通又如果實屬者雖盧扁復生亦不能施  
其巧凡汗下不解煩悶咳嗽嘔吐足冷不温便是發斑  
之候

温毒發斑黑膏主之渴而心悶下利嘔吐下部有瘡或  
口瘡黃連橘皮湯葛根湯橘皮湯陽毒發斑狂顛妄言  
面赤咽痛身斑如錦下利赤黃升麻湯麥奴丸有下證  
調胃承氣湯

時氣發斑大青四物湯猪膽雞子湯

發斑通用升麻湯犀角地黃湯

熱多者玄參升麻湯黃連一物湯青木香一物湯

凡赤斑五死一生黑斑不救

### 動氣

動氣者臟氣不調築築跳動隨臟所主而形見於臍之左右上下也難經各藏載之又有真氣內虛水結不散氣與相搏卽發奔豚以其從氣衝突如豚之奔皆不宜汗下然而獨不言脾當臍之有動氣者脾爲中州以行

津液妄施汗下必先動脾是以不言而喻也左右上下不宜汗下何況中州之氣其敢輕動之乎傷寒所以看外證爲當者蓋不在脈之可見必待問之可得發汗下其可輕舉哉

動氣通用理中湯去白朮加桂白朮燥腎閉氣故去之桂泄奔豚加之一法用柴胡桂枝湯亦良二方當看有熱無熱動氣在左發汗則頭眩汗下不止筋惕肉瞤爲逆先宜防風白朮牡蠣湯汗必與建中湯動氣在右發汗則衄而渴心若煩飲則吐先宜五苓散後與竹葉石



膏湯

動氣在上發汗則氣上衝心桃根湯動氣在下發汗則  
心中大煩骨節疼痛目暈食入卽吐先宜大橘皮湯後  
與小建中湯動氣在左不可下下之則腹滿拘急身雖  
熱反欲拳先宜甘草乾薑湯後與小建中湯動氣在左  
下之則津液竭咽乾鼻燥頭眩心悸宜竹葉石膏湯動  
氣在上下之則腹滿清穀心痞頭眩宜甘草瀉心湯

蛔厥狐惑

蛔厥屬厥陰病人素有寒妄發其汗或汗後身有熱又

復汗之以致胃中虛冷飢不欲食食卽吐蛔而乍靜乍  
煩者蛔或上而或下也蟲聞食臭必出所以食卽吐蟲  
也蛔厥先用理中丸次用烏梅丸若誤下之利不止用  
四逆湯

狐惑失蠶皆蟲證也蓋腹中有熱入食無多腸胃空虛  
故三蟲求食而食人之五臟也其候四肢沉重惡聞食  
氣默默欲眠目不能閉齒晦面眉間赤白黑色變易  
無常蟲食下部爲狐下唇有瘡其咽乾蟲食其臟爲惑  
上唇有瘡其聲啞治蠶通用桃仁湯黃連犀角湯雄黃

銳散無陽者用金液丹厥陰爲病消渴氣上衝心飢不欲食食卽吐虬曰胃寒復有消渴之證蓋染其上焦而中焦則但寒無熱矣又有大便難一證並用理中湯加大黃入密少許微利之

### 百合病

百合者百脉一宗舉身皆受病無復所謂經絡傳次也大病虛勞之後臟腑不平變而成此其狀似寒無寒似熱無熱欲食不食欲卧不卧欲行不行口苦便赤藥入卽吐利也其脉微數每尿則頭痛六十日愈頭痛者但

淅淅然惡寒者四十日愈若尿則快然但頭眩者二十日愈百合知母湯百合地黃湯滑石代赭湯雞子湯百合洗方可選用之

不仁

不仁謂不柔和也經曰諸虛承寒則爲鬱冒不仁蓋其血氣虛少不能週流於身是爲邪氣所伏故肌體頑麻不知痛痒寒過厥如尸而鬱且冒也設或脉浮而洪身汗如油喘而不休水漿不下形體不仁又此爲命絕也經曰少陰脉不至腎氣微精血少寒氣上奔血結心下

陽氣退下熱歸陰肱與陰相動人之身不仁此爲尸厥  
以鬱冒不仁爲可刺之而得痊者實神醫之診也甘草  
乾薑湯桂枝芍藥湯加乾薑桂枝麻黃各半湯宜消息  
選用之

### 霍亂

霍亂者上吐下利揮霍而撩亂者是也邪在上焦吐而  
不利邪在下焦則利而不吐邪在中焦旣吐且利然胃  
氣爲邪氣所傷陰陽乖隔遂上吐而利也乃謂霍亂其  
餘但稱口利者有以異也乾以乾霍亂死者多溼霍亂

死者少吐利則所傷之物得以泄出胃中水穀盡也其證則有異焉大便硬而氣短者實也汗下後而得噦者虛也當詳究之

太陽初得病發汗不徹併于陽明續自微汗出面色赤者陽氣拂鬱也解肌湯

或汗久不徹其脈浮緊與麻黃湯

小便不利時有微熱大便乍難拂鬱不得卧此燥屎裏實也承氣湯主之

汗下後虛熱又復下之其人拂鬱復與之水因而成噦

此胃中寒也桂枝人參湯加茯苓

瘧後昏沉

傷寒瘧後半月以來十餘日終不惺惺錯語少神或寒熱似瘧或潮熱頰赤醫以風溫治之非也是由發汗不透寒熱在心包絡間也

瘧後沉昏不醒知母麻黃湯取微汗胃脘有熱虛煩而嘔竹葉石膏湯加生薑嘔吐不已隔上有寒理中湯瘧後從腰以下有水牡蠣澤瀉散

瘧後日暮微煩以其病方瘧強與穀食不消也損穀則

愈矣

傷寒四證類玄出指掌圖

痰證

外證增寒壯熱惡風自汗胸滿氣上衝咽不得息但身  
不疼項不强若涎多者亦隱隱頭痛脉有寸浮者亦有  
寸伏者以意叅之柴胡半夏湯金沸草散大半夏湯氣  
上衝者瓜蒂散吐之

傷食

亦頭疼惡寒身熱但左手脉平和右手脉緊盛知爲食



也大橘皮湯二陳湯心腹滿痛大柴胡湯下之胸滿嘔吐瓜蒂散吐之

虛煩

諸虛煩熱與傷寒相似但不惡寒頭不疼身不痛爲異耳表旣虛不可汗裏不實不可下叔和云虛煩熱不可攻

腳氣

傷寒傳足不傳手所以寒溼之氣發於足則類傷寒其證頭疼身熱肢節痛大便秘或嘔但初病時起於腳膝

屈弱不能移動爲異耳感於寒所患必冷越婢小續命湯入生薑汁最妙感於暑所患是熱小續命去附子減桂一半脚腫木瓜散檳榔散大便秘脾約丸

小便自利

太陽身黃小便當不利今反自利其人如狂血證也抵當湯

傷寒有熱小腹滿應小便不利今反自利爲有血也抵當丸下之尿血延胡索湯

延胡索

樸硝二兩

爲末每服四錢水二盞煎八分溫服

陽明自汗應小便不利而反自利津液內竭也屎雖硬不可攻宜密導煎豬胆汁法

少陰四逆小便自利虛寒也四逆湯及真武湯去茯苓  
小便秘或赤知內有熱也小便自利其人如狂小腹滿  
知不爲熱乃畜血也若陽明津竭自利與夫少陰自利  
乃胞寒不禁可不溫乎

### 熱入血室

婦人中風發熱惡寒經水適來得之七八日熱除脈遲

身涼胸脇滿如結胸狀譫語者此爲熱入血室當刺期門隨其實而泄之

婦人傷寒發熱經水適來晝日陰了暮則譫語如見鬼狀此爲熱入血室無犯胃氣及上中二焦必自愈婦人中風七八日續得寒熱發作經水適斷此爲熱入血室其血必結故如瘧狀小柴胡湯

陽明下血譫語此爲熱入血室但頭汗出者刺期門隨其實而泄之澱然汗出而愈

婦人熱入血室有二經水適來二條不言藥者蓋以經

血方來熱氣乘虛而入經血止則熱亦出矣故不可用  
汗下藥犯其胃氣及上中焦如其胸滿譫語此內實也  
刺期門以泄之若經水適斷續得寒熱其血必結故用  
小柴胡湯若陽明熱入血室此男子失血之證但當刺  
以泄熱也

### 傷寒脈治心法

夫仲景論傷寒以脈大浮數動滑爲陽沉潛弦微弱爲  
陰然義理精深未易識察今將浮中沉三候圖其下就  
說症治之法使因脈以明症緣症以知藥因此達彼由

精識初抑可爲初學之階梯耳若能進退不已益求其至則仲景之堂庶幾從此而升矣博雅君子幸毋誚焉

### 診脈之法

凡診脈之分三部九候浮脈三候中脈三候沉脈三候三而三之以成九候然後知病之淺深表裏而爲處方之標的豈可忽畧於脈而欲求病之所在乎陰脈定經得乎心而應乎手如此而治有枉死者吾不信也若脈症不明處方無法鹵莽行醫視人命如草芥他日不受天殃亦未之信矣